



Il marangon che al veve di vignî a scurtâ le puarte a lu veve clamât par rimandâ l'apontament e cussî lui nol veve bisugne di restâ a spietâlu. Miôr di cussî a no si pues. E vie lui al munizipi.

Al mucizipi al veve paiât il parcament par miezore ma devant dal sportel a nol jere il prin e il timp al jere passât plui svelt che il so turni. Varessial vût une multe tornant fûr?

- Uf, nuie multe!

Alore nuie porcos. Tirâ il flât e vie a fâ le file in pueste ma cheste volte al veve paiât il dopli e alore, nancje a fâlu a pueste, al veve stât le metât.

Miôr di cussî...

Aes 10 al sunave il campanel tal puarton dal so prin apontament.

Ma sune e risune, nissun nol vignive e al si jere sentât te machine a spietâ. Al veve vierzût le radio e po le veve studade par rispuidi al telefonin

...Osco, le colf, al veve dismenteât le colf! Jerie devant di cjase che spietave? No, vuê a no stave ben, a clamave par visâlu che no sarès vignude.

Miôr di cussî a si sclope... da ridi, ma veval di anulâ l'apontament dal mechanic? Ma no, parcé? No veval spietât lí avonde? Dopodut, se un al rive in ritart al à di assumi la sô falope. Al zirà la clâf par inviâ 'l motôr e al cjapà le strade par lâ dal mechanic. Se i lave ben al sarès rivât prin da l'ore.

Ma il lunis di buinore il trafic al é gnervôs, a volin ducj passà prime come se fossin ducj in ritart. Siché, par passâ ducj insiemet a nol passe plui nissun e al jere miôr clamà il mechanic par dî che al sarès rivât un tichinin in ritart. Veval il numar? Osco di un...

Si, a lu veve si. Ma a pene fracât sul so non, il telefonin al si jere studât. Osco boie... Le batarie! Dio...

Miôr impiâ le radio che zuntâ alc altri e lí al sunave le ore dal gjornâl des 10.

- Cemût lis dîs? Ma ce osco di radio ise che lì?

Al stave par studâle di stice ma invezit al sclopà intune ridade da fâ voltâ il cjâf a ducj chei des machinis dongjie de sô.

Tant che al rideve, un ai veve fat segno cule man tal cerneli: Jerial diventât mat?
E lui ridint inmó di plui a i veve fat sí cul cjâf. Chel altri al veve alçât lis spalis malfidât
fasintlu ridi inmó di plui. Ma parcé ridevial tant? Al veve a pene capît che a scomençave le
ore d'Istât e alore nol jere in ritart ma in anticip. Ce ridi! Ce biel di podê tornâ indaûr cul
timp!

Dome che pal apontament des 10 se prime al jere in anticip crodint che al jere in ritart,
cumò al jere in ritart crodint che al jere in anticip!

di Jaio Furlanâr
#222